

中國歷代畫史匯編

中國歷代畫史匯編

(2)

圖
繪
寶
鑑

圖繪寶鑑卷四

吳興夏文彥士良纂 賓山吳麒子仁謹錄

山陰馮仙澍泚鑑 樵李顧 銘仲書

後學新安程 鵠昭黃 華亭吳 賓魯公重訂

蕭山張振嶽崧高 廣陵陳 申蘧菴

宋 南渡後

高宗書畫皆妙作人物山水竹石自有天成之趣上用乾卦印晚居北內多用太上皇帝之寶德壽殿寶御府圖書

趙士遵高宗之叔封漢王善人物山水著色景頗似李昭道紹興間一時婦女服飾及琵琶阮面所作多以小景山水實始於士遵然其筆超俗特一時倣倣宮中之化非專爲此等作也

趙子澄字處廉宋宗室嘗作濺瀑欲動屋筆力極道壯

景獻太子諱詢燕王德昭九世孫希懌之子善畫竹石其子廼裕孝宗之弟也官至保寧軍節度使臨川郡王謚莊靖書學高孝兩朝筆法尤工墨竹喜

作掛屏長竿枝梢傍出如簷底乍見濃墨獵獵頗具掀舞之態題詩其上用善雅堂印

趙師宰字牧之居天台臨海登真西山門學墨竹得徐熙之妙見稱於人號隨菴

趙與懃居處州青田正惠公希暉之子嘉熙間知臨安府以右文殿脩撰奉祠與兄與憲以治辦並稱於時臨模古畫莫能辨善作墨竹號蘭坡

趙伯駒字千里善畫山水花禽竹石尤長於人物精神清潤能別狀貌使人望而知其詳也高宗極愛

重之仕至浙東兵馬鈐轄

趙伯驪字希遠千里弟善畫山水人物尤長於花禽
傅染輕盈頓有生意嘗畫姑蘇天慶觀樣進呈孝
宗書其上令依元樣建造今玄妙觀是也仕至觀
察使子師宰官至八座

趙孟堅字子固號葵齋居士居海鹽廣陳鎮寶慶二
年進士脩雅博識人比米南宮東西游適一舟橫
陳僅畱一榻偃息地餘皆所挾雅玩之物意到左
右取之吟弄忘寢食過者望而知爲趙子固書畫

船也善水墨白描水仙花梅蘭山礬竹石清而不
凡秀而雅淡有梅譜傳世官至朝散大夫嚴州守
趙孟淳字子真子固之弟繼秀安僖王後自號竹所
墨竹可觀

趙孟奎字文耀太師忠惠公與憲之子號春谷畫竹
石蘭蕙官至祕閣脩撰

吳琚字居父憲聖皇后姪太寧郡王益之子性寡嗜
好日臨古帖以自娛字類米南宮作墨竹坡石品
不俗自號雲壑歷尚書郎部使者直學士慶元間

以鎮安節度使畱守建康世稱吳七郡王汴人

楊瓚字繼翁恭仁皇后姪孫太師次山之孫度宗朝
女爲淑妃官列卿好古博雅善琴時作墨竹自號
守齋

楊鎮字子仁嚴陵人號中齋節度使蕃孫之子尚理
宗周漢國公主工丹青墨竹在鄆王員大夫間蘊
藉可觀凡畫賦詩其上卷軸印記清致異常用駙
馬都尉印

謝堂號恕齋善畫竹拂蘭松石窠木清雅可愛官至

樞密使

米友仁字元暉元章之子能傳家學作山水清致可
掬畧變其父所爲成一家法煙雲變滅林泉點綴
草草而成不失天真意在筆先正是古人作畫妙
處每自題其畫曰墨戲晚年多於紙上作之

廉布字宣仲山陽人自號射澤老農畫山水尤工枯
木蘖竹竒石松栢木學東坡青出於藍官至武學
博士以張邦昌壻負才不得用子孚亦有父風

王清叔號惺齋開封人乾道間進士又號醒菴學廉

宣仲畫枯木竹石官至太府卿世稱王經畧之名
特著

楊補之字無咎號逃禪老人南昌人也祖漢子雲其
書從才不從木高宗朝以不直秦檜累徵不起又
自號清夷長者水墨人物學李伯時梅竹松石水
仙筆法清淡間野爲世一絕

韓侂胄字節夫嘉泰間爲平章太師善水墨竹石所
畫大葉琅玕自稱太師竹卷軸上用安陽開國印
記

俞澂

一作徵

字子清吳興人作竹石得文蘇二公遺意

清潤可愛光宗朝任大理少卿號且軒

晁說之字以道號景迂喜作帶景秋色蘆鴈世惟知
崔白不知以道尤妙官至侍讀學士

李昭字晉傑鄆城人李文靖之曾孫山水學范寬又
善畫花長於墨竹自云他人以蕭疎爲能余以重
密爲巧吾一派不讓文湖州也尤精篆學三墳記
魏燮字彥密北人長於水墨梅竹雜畫工詩高宗見
而喜之除浙西叅議

陳鰲字仲舉吉州人自號石臺居士精長短句工畫魚幾於徐白紹興年間人

王利用字賓王潼川人舉進士善畫山水長於人物精謹而已亦能書高宗頗愛之官至夔憲

朱敦儒字希真河南人善畫山水官至浙東憲

江叅字貫道江南人形貌清臞嗜茶以爲生居雪川深得湖天之景平遠曠蕩盡在方寸長於山水師

董源

鄭希古河東人長於平畫每出新意輒過人初未甚

精紹興初遇郝章於閩州盡得其法

楊簡字敬仲慈溪人喜作墨竹有石本橫枝傳世理
宗朝官至寶謨閣學士人稱曰慈湖先生

王會字元叟工花鳥頗拘院體枝葉爪羽窮極微細
乾道間官朝請大夫

馬和之錢塘人紹興中登第善畫人物佛像山水儼
吳裝筆法飄逸務去華藻自成一家高孝兩朝深
重其畫官至工部侍郎

陳容字公儲自號所翁福堂人端平二年進士歷郡

文學倅臨江入爲國子監主簿出守莆田善畫龍
得變化之意潑墨成雲噴水成霧醉餘大叫脫巾
濡墨信手塗抹然後以筆成之或全體或一臂一
首隱約而不可名狀者曾不經意而得皆神妙時
爲松竹作柳誠懸鐵鉤鎖之法寶祐間名重一時
垂老筆力簡易精妙絳色者可並董羽

單煒字炳文好古博雅與江白石友善書喜寫竹
張端衡鎮江人畫木石有名以進士調句容縣尉
丁權字子卿越人善畫竹自述竹譜

陳珩字行用號此山所翁弟亦善龍水時亦作水墨
枯荷折葦蟲魚鱗鵲及墨竹極有生意仕朝請郎
艾淑字景孟建寧人號竹坡早游太學善畫竹與陳
所翁同舍畫龍俱得名時稱六館二妙仕爲寧海
軍節度判官時又有茅汝元舉進士號靜齋善墨
梅人以艾竹茅梅爲稱

林泳興化人庸齋林希逸之子善墨竹自號弓寮又
號艮齋

魯之茂海鹽當湖人號雪村畫梅竹寧宗朝仕爲郎

王杓

一作栢

字會之號魯齋金華人丞相淮之族事朱

氏門人楊船山又從何北山不求聞達德祐間將起之俄卒梅竹之妙不妄與人世罕知之

湯正仲字叔雅江西人楊補之甥後居黃巖號閒菴開禧年貴仕善畫梅竹松石清雅如傅粉之色水僊蘭亦佳大抵宗補之別出新意用湯氏叔雅印畢良史字少董紹興間進士善作窠木竹石雲龍能寫唐人小楷書畫俱妙

陳虞之字雲翁號止所溫州人咸淳初進士深於易